



3. maj 2019

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

### **Naalakkersuisunut apeqquut:**

- 1. Atuarfeqarnermut ilinniarfeqarnermullu tunngatillugu sulineq annertoq Naalakkersuisut 2017-ip ukiariartornerani aalajangiiffigaat.**
  - Aalajangiineq tamanna ulloq suna piva?
  - Eqqortumik paasivara aalajangiunneqartumi qulaqutarineqarmat atuartitaanermut ilinniartitaanermullu iluarsartuusseqqinnissaq?
- 2. Ataani atsiortunga paasivara suliaq tassaasimasoq atuartitaanermut ilinniartitaanermullu iluarsartuusseqqinnissaq maanna allamik qulequtserneqarsimasoq, tassalu *“Ilinniartitaanerup aaqqissuussaanera eqqaatsoq ataqatigiittoq, nalilersuineq ineriartortitsinermillu suliniut”*.**
  - Qulequttamik allanngortitsineq, tassalu iluarsartuusseqqinnerujunnaarluni nalilersuinermit ineriartortitsinermullu saatinneqarnera, pillugu aalajangiineq ulloq suna piva?
  - Qulequttap allanngortinneqarnissaanik kina aalajangiiva?
- 3. Naalakkersuisut ilisimatitsissutigisinnaavaat iluarsartuusseqqinnissamik siunertaqaqqaarnermi suliassap imarisaa allanngortinneqarani – nutaamilli qulequtserneqarluni – ingerlatiinnarneqarnersoq?**
- 4. Naalakkersuisut ilisimatitsissutigisinnaavaat meeqqat atuarfianni ukiut 10-it atuarnermik aaqqissuussineq annertuumik suli allannguiffigiarnarneqarnersoq?**
- 5. Naalakkersuisut ilisimatitsissutigisinnaavaat iluarsartuusseqqinnissamik taaguiunnaarnerup suliniummilli suliaqalernerup maanna sulinerup piffissamilu aggersumi sulinissamut qanoq sunniuteqassanersoq?**
- 6. Naalakkersuisut ilisimatitsissutigisinnaavaat allannguinerit qaqugu atuutilissanersut?**

7. Naalakkersuisut ilisimatitsissutigisinnaavaat sulinermut akuutinneqartut tamarmik suliniutip qulequtaata allanngortinneqarnera pillugu qanga ilisimatinneqarsimanersut?
8. Naalakkersuisut ilisimatitsissutigisinnaavaat atuarfeqarneq ilinniartitaanerlu pillugit suliniuteqanermi qitiusumik imarisaanik allannguisoqarsimappat tamatuma sulinermut akuutinneqartunut qanga ilisimatitsineq pisimanersoq?
9. Naalakkersuisut ilisimatitsissutigisinnaavaat oqaaseq iluarsartuusseqqinneq atorunnaarlugu suliniummik taarserneqarsimanera pillugu Kultureqarnermut, Ilinniartitaanermut Ilageeqanermullu Ataatsimiititaliaq qaqugu ilisimatissanerlugu pilersaarutigisimallugu?
10. Naalakkersuisut ilisimatitsissutigisinnaavaat oqaatsit iluarsartuusseqqinneq aamma suliniuteqarneq namminneq qanoq isumaqartinnerlugit?

(Inatsisartunut ilaasortaq Sofia Geisler, Inuit Ataqtigiit)

### **Tunggavilersuut:**

2017-imi ukiassariartornerani taamani Ilinniartitaanermut il.il. Naalakkersuisoq Doris Jakobsen Jensen nalunaarpoq ilinniartitaanermut tunggatillugu iluarsartuusseqqinneq aallartillugu.

Maanna ilisimalerparput taagu iluarsartuusseqqinneq piissallugu Naalakkersuisut aalajangersimasut, taarsiullugulu sulineq suliummik taagorneqalersimasoq. Tamanna paatsuungalersitsivoq, iluarsartuusseqqinnissamik sulinissami sulinermut tunngasut pillugit qanga soorlu allannguinissaminnik Naalakkersuisut aalajangersimanersut aammalu sulinerup imarisaa allanngoranit nutaamilli qulequtsiinnarlugu ingerlanneqarsimanersoq.

Naalakkersuisutut ivertitaanerminut atatillugu Ane Lone Bagger 2018-imi oktoberip qiteqqunnerani Sermitsiamut oqarpoq pulaffigisussanngorlugit ilinniartitaanikkut iluarsartuussinissaq tassungalu tunngasut periusissiat.

Meeqqat atuarfiini pisortat pisortatut ilinniagaqalernissaat pillugu oqallisissiatut siunnersuutima 2018-imi oktoberimi oqaluuserineqarneranut atatillugu Naalakkersuisut nalunaarutigaat aamma meeqqat atuarfiannut sunniuteqartussamik iluarsartuusseqqinnermik suliaqarlutik.

Suliarli maanna suliniummik qulequtserneqarsimavoq, Naalakkersuisunullu apeqquteqarninni paaserusunnaaqaq meeqqat atuarfiat ilinniartitaanerlu pillugit Naalakkersuisut pilersaarutaat sordiaanersut, taakkumi sukumiisumik ukkatarineqarnissaat aatsaat taama pingaartigileqqammat.

Kissaatigivara apeqqutikka ullut suliffiusut qulit qaangiutinnginneranni akineqarnissaat.